



Jumat, 29 Maret 2022

Ogen: Kuan-kuanen 23:1-3



Ola Sangkar



Tergoda kel Hawa ngidah buah batang kayu i tengah peken Enden. Buah e niakap pangan si entabeh janah banci erbahanca ia reh jorena bali ia ras Dibata si meteh mehuli ras si jahat. Enda me bena-benana erbahanca Hawa ndabuh ku bas dosa. Pangan e mejile "menarik perhatian" turah sura-sura segelah banci ipan. Kitab Kuan-kuanen 23:1-3 nehken petuah kalak pentar. Kune lit kesempatan guna kundul ras Raja, janah ielaken me pangan-pangan si mbue dengen entabeh erbahanca merincuh kal guna manca. Ipersingeti maka "ola sangkar" sabap banci saja pangan e sada jerat. Pangan e jadi sada alat perangkap si banci erbahanca kita guling, kote, sakit ras sidebanna.

Mekatep kel lit kuan-kuan "adi manggalah (ma nggalar), santap habis saja", lit ka tole "adi ban buahna e mesepak batangna labo jadi persoalen kel." Konsep perukuren si bagenda e me si la make alat kontrol, si penting besur janah seh besurna.

Lit ka deba jadi kinihagan kel man si mada jabu adi se isi jabu bage pe temuena man janah tambah. Ngatakenca pangan e entabeh adi melala i pan. E maka rusur kel ikataken "tambahi tole."

Enda kerina godan-godan bas pangan. Tetaplah inget maka kita enda Moria, siertanggungjawab i bas ngaturken kesehaten se isi jabu. Kita me sibelanja dengen sierdakan, ngaturken menu si man pangan dengen ngelaken pangan e man se isi jabu e. Adi matata dengen babahta penggurunta e erbahanca kesehaten man jabuta tergangu. Benaken la bas meja makanta nari nikapken pangan si sehat dengen secukupna alu erbahan daftar menu pangan si sehat. Ambah si e siajarilah anak-anakta segelah ngasup ngidah pangan enda mbelin mereken ngaruh ku kegeluhen kula bage pe pertendin. Bagi pertoton siniajarken Tuhan Yesus "bereken man kami nakan secukupna i bas wari si sendah."

Ingetlah ola sangkar, sabap langga bo tentu kerina si pan kita e ngerekeh kesehaten. E maka panlah pangan si sehat labo si sedap.